



MOCIÓN DO GRUPO MUNICIPAL DE COMPOSTELA ABERTA PARA INSTAR Á XUNTA DE GALICIA A CONSTRUCIÓN DUN NOVO ESTACIONAMENTO PÚBLICO NAS INMEDIACIÓNS DO HOSPITAL CLÍNICO UNIVERSITARIO DE SANTIAGO.

O concelleiro de Espazos Cidadáns, Dereito á Vivenda, Mobilidade e Relacións Veciñais, Jorge Duarte Vázquez, presenta para o seu debate e aprobación no Pleno a seguinte **MOCIÓN**:

LIMIAR

No pasado mes de setembro cumpríronse 19 anos da posta en funcionamento do Hospital Clínico Universitario de Santiago. Despois de máis de seis anos de obras foi a primeiros de setembro de 1999 cando o Clínico comezou a funcionar e iniciando a transformación urbanística da Choupana e Santa Marta. Nos anos posteriores o desenvolvemento da zona xirou ao redor deste impresionante edificio e das súas construcións anexas. Construíuse a Avenida de Barcelona, un estacionamento soterrado e diferentes ampliacións e edificios anexas ao propio Hospital. O clínico, integrado no Complexo Universitario de Santiago (CHUS), dá servizo a unha área de poboación de case 400.000 habitantes, ao que hai que incluír toda a poboación flotante e visitantes que soporta a nosa cidade.

Xa nesa construción inicial o Concello de Santiago foi peza clave cedendo os terrenos para a construción, por parte da administración galega, do actual estacionamento do Hospital. Asimesmo, administración local, a través da empresa municipal de transporte TUSSA, ofrece conexións coas liñas 1, 12, C2 e C4 do autobús urbano. Ademais realizouse unha ampliación liña 1 para que conectar o Hospital directamente co aparcadoiro municipal da Volta do Castro.



No ano 2017, o alcalde de Santiago trasmitiulle ao conselleiro de Sanidade, Jesús Vázquez Almuíña, a disposición do Concello para colaborar nas ampliacións e reformas dos hospitais que fan parte do CHUS, resaltando a necesidade da búsqueda dunha solución aos problemas de espazo para estacionar.

A partir deste primeiro contacto o Concello iniciou unha interlocución directa coa veciñanza e o tecido asociativo da Choupana e Santa Marta no que se recolleu unha serie de queixas e necesidades entre as que destaca a problemática arredor da ampliación e reordenación do estacionamento do Hospital Clínico. A Concellaría de Espazos Cidadáns trasladou todas estas necesidades á xerencia do CHUS nunha xuntanza mantida o seis de abril do 2017, chegando a unha serie de acordos para a mellora da mobilidade e o estacionamento na zona garantindo a accesibilidade peonil.

Seguindo o acordado nesa reunión o Concello xa modificou o PXOM para permitir a ubicación dun estacionamento de catro plantas baixo un espazo público, na parcela sita xunto ao CIMUS que dea servizo ao centro hospitalario. Sen recibir novas concretas sobre os avances que se trataron, o pasado dezaséis de abril solítase nova xuntanza coa Xerencia do CHUS, reiterada o tres de agosto ante a falta de comunicación coa concellaría.

Por todo isto, e sen que a día de hoxe a Xerencia retomara o diálogo en torno a ampliación e reordenación do aparcadoiro do CHUS, o grupo municipal de Compostela Aberta presenta para a súa aprobación no Pleno os seguintes **ACORDOS**:

1. Urxir á Xerencia do CHUS que realice os trámites pertinentes para a ampliación e reordenación do aparcadoiro do Hospital Clínico, impedindo o aparcamento en beirarrúas e garantindo a



accesibilidade, mantendo o diálogo e acordo co Concello de Santiago.

2. Solicitar á Xerencia do CHUS que complete o estudo que acordou elaborar sobre as necesidades de estacionamento, cuantificando a demanda de traballadores/as e as demandas das persoas usuarias, diferenciando entre períodos de ocupación ao longo do día.
3. Instar á Xunta de Galicia a que contemple e incorpore nos próximos orzamentos de 2019 as partidas necesarias para realizar a construción do novo parking público que dé servizo ao Hospital Clínico.
4. Dar traslado dos seguintes acordos ao Parlamento de Galicia e a todos os grupos parlamentares nel representado.

Santiago de Compostela, 9 de outubro de 2018

Jorge Duarte Vázquez
Concelleiro de Espazos Cidadáns, Dereito á Vivenda, Mobilidade e
Relacións Veciñais.